

山西通志卷第十三

山西巡撫都察院右副都御史臣覺羅石麟奉

旨修輯

關隘五

寧武府

寧武縣

寧武關古樓煩地據雁門偏頭兩關之中明初爲軍屯景泰元年築城成化二年巡撫都御史李侃言寧武北臨雲朔西帶偏保最爲要衝請設關置守備於是因遼寧武軍舊名立關宏治間巡撫都御史侯恂復奏置守禦所轄堡十有二東爲大河爲陽房爲朔寧北爲神池爲大水口爲利民西北爲黃花嶺爲土棚爲義井西爲寧文爲二馬營西

南爲西鎮而寧文實犄角寧武以扼西山之險嘉靖十三年都御史任洛自鵬窩梁至達達墩築邊八里二百二十步砌以石十八年都御史陳講議陽房要衝迤西胥缺藩籬乃修復王野梁廢蹟東起陽房口經溫嶺大小水口神池蕎麥川至八角堡胥築長城凡百八十里且築且勵土石相半外爲壕塹十九年兼轄寧化所二十二年置三關鎮守總兵官駐寧武轄雁門偏頭二關二十三年都御史曾銑謂邊牆高厚不逮雁門復增築焉 明景泰元年築城方四里高三仞厚二仞門樓三成化元年訖工宏治十一年巡撫魏紳拓故城周七里一百二十步高二丈五尺下有塹 寧武關東北至陽方口又北至朔寧堡又北至鵬窩梁堡內邊垣胥在西 朔州志寧武軍口在朔州

南一百二十里南連靜樂縣分水嶺左編寧武處三關之中援應東西實陽方溫嶺神池義井之門戶外接八角堡內維岢嵐唐志管涔山北有樓煩關按今寧武當卽古樓煩關地周經寧武關紀寧武古寧武軍也卽軍舊名名關宋太平興國中潘美兼三交都部署屯留以捍北邊三交西北三百里地名固軍其地險阻爲北邊咽喉美潛師襲之遂據其地積粟屯兵以守之北邊以寧楊博三關兵將疏山西三關先年以有東勝大同爲之屏蔽邊患絕少自東勝失守漸肆窺視然猶恃有大同未敢深入今三關之警大異往昔正德十二年則直至陽曲灣今歲則直至交城圪塔頭若更長驅而入雖平陽潞安俱爲蹂踐之地矣今都御史陳講御史連鑑覆勘具奏臣等議得

神池堡與老營堡委係必爭之地而八角堡介於其間尤爲適中雁門守備當十八隘口之險而北樓口委爲空濶所據各官要於神池老營堡各添設叅將北樓口添置把總八角堡改置遊擊畫地分守勢成鼎足據險扼塞誠爲長便又要將神池守備改置利民堡三岔八角俱爲裁革水泉營等處設置把總管領屯種要皆劑量斟酌無不曲當但副總兵旣與巡撫都御史協同行事威權已重欲加都督職銜似難輕議今俟命下施行巡撫都御史每年秋近仍駐劄寧武八角以上仍轄雁門兵備五寨以下仍轄岢嵐兵備庶聲勢聯絡緩急有濟及照東長峪地方係大同三關兩鎮接境之地極爲緊要其建城設兵於兩鎮旣稱有益亦當及早整理方逢時邊關機宜疏三關俱通

寇要區東路自盤道梁夾柳樹燕兒水鵬窩梁等堡進直犯代忻太原等處西路自滑石澗黃龍池寺塢堡水泉營等堡進直犯鎮西興嵐等處中路陽房口王野梁失守少費迂迴可達東路矣莧麥川野猪溝失守少費迂迴可達西路矣此邊形之大較也東中二路外有馬邑朔州烽火相接零騎遽難以潛入大舉或數年一至西路邊長二百餘里東自水黃墩起西至了角山止一百餘里尙在朔州川之內自了角山起西至老牛灣止一百餘里逼隣沙漠大舉憑陵易逞零騎出沒無常御史賀一桂移鎮之說有見於此計寧武離偏關一百八十里正兵營軍馬在三路土著有年勢難他徙其叅遊軍馬果數足勢强大舉雖未能遏絕零騎必可拒堵此移鎮之便也查兩營軍少一千

三百三十四名馬少三千四百四十二匹而遽移之是總兵亦叅將等也寇豈憚一總兵官名乎况偏關抵崞縣原平驛二百餘里東路報警策應恐難猝至此移鎮之未便也先年俺答乘虛謀陷老營總兵郭琥早得其情由寧武日暮提兵四鼓卽抵其地而堡賴以全是不移與移鎮同也今該鎮劉國旣稱軍馬寡弱東路寫遠合無依其仍駐寧武遇三路但有聲息星馳調度隨賊堵截 李攀龍寧武兵備題名記三十七年改雁門爲雁平岢嵐爲偏寧明年仍以偏寧爲岢嵐兵備以偏老岢嵐河曲三守備西路叅將老營遊擊地方兵馬屬之雁門兵備仍駐代州以廣武北樓平刑三守備東路北樓太原叅將地方兵馬屬之其八角利民神池寧武四守備中路叅將地方兵馬則以

設今道云 上谷岳倫曰山西京師之屏翰三關山西之咽喉 嘉靖二十六年總督翁萬達議撤山西內邊兵并力守大同報可巡撫孫繼魯抗章爭曰紫荊居庸山海諸關東枕溟渤雁門寧武偏頭諸關西據黃河天設重險以藩衛國家豈可聚師曠野洞開重門以延敵夫紫荊諸關之拱衛京師與雁門諸關之屏蔽全晉一也今議者不掣紫荊以并守宣府豈可獨掣雁門以并守大同耶兵部是繼魯言上方倚萬達卒如萬達言

陽方口堡在布政司北三百六十五里東至盤道梁堡六十里西至神池堡二十五里南至寧武所界二十五里北至朔州五十五里 兩鎮三關志寧武據兩關之中地勢平衍便易馳驅陽方口當雲朔馬邑之衝至爲要害雖距寧

武爲近而緩急常不得力近日築邊之議首及王野築至老營蓋先慮也 康丕揚三關志陽方口晉邊第一要害

地 胡松答翟中丞書陽方口外當雲朔馬邑之衝內通忻代嵐石諸郡之路至爲要害鎮城雖距寧武爲近然緩急終不得力宜以寧武所城移陽方 陳講上議曰西北

邊鎮莫重宣大三關國初急宣大而緩三關以大同足資

三關也今時則異矣故必急三關急三關必增戍增戍必

先設險夫雁門有勾注之險偏頭有老營之阨故增戍必

自寧武始陽方口者朔州之大衝也 臣願藉山西民壯夫

力而濟以郡縣贖金城是大險不三月可就從之於是築

長城自陽方口始 胡松陽方堡築城記西蜀陳公講記

受命上公提督三關兼巡撫山西地方乃言於朝曰山西

雁門寧武偏頭諸關爲國重鎮東起代之瓶形嶺西暨保德河曲地東西延袤千有餘里而寧武關之陽方口東西長可百八十里適當朔州大川之衝平衍夷漫雖數十萬騎皆可成列以進臣查山西諸路民壯可得萬餘忻代五臺諸郡邑權金歲得數千不足則取諸太原所部吏民贖鍰費不傷乎正額勞不及於齊民其築之便上下其奏兵部兵部議如公指無異乃以雁門兵備副使王鎬察奸經費都司署都指揮同知王松太原府同知邢倫總督工程其下文武百執事並選廉慎而有幹者使攝之經始嘉靖十九年之春三月畢工明年之夏六月東起陽方口經溫嶺大小水口神池蕎麥川迄於八角堡之野猪溝老營堡之丫角墩土築惟半餘則斬山之崖爲之計長三萬三千

一十餘丈可百八十里無論土石並高二丈有奇下廣一丈五尺上廣七尺加四尺爲女牆可騎以馳可蔽以擊牆外壕塹深廣之度略如牆中增敵臺四十三座煖舖五十間暗門五座重樓三座護水堤臺稱之包築流水溝洞百十二處後中丞劉公臬代奉廷議屬予與叅政張君子立規計工事補築東路三百里按察司僉事趙君瀛補築西路黃河堰百五十里〔灰河〕東流經堡北出口 崞縣陽方倉寓陽方口 正德九年十月寇由陽方口深入至陽曲灣 嘉靖三十四年俺答入宣大山西俄而自陽方口出總督許論遮擊於朔州復由王茂山遁 三十九年俺答自陽方入犯忻州原平石嶺關復由此出以此地梁內梁外皆平曠無際故設大將於此 趙炳然分布秋防

疏山西總兵統正兵暫駐陽方口一則調度本境一則便
援雲朔副總兵統奇兵仍駐老營一以專防黃河一以東
西勦遏西路叅將統援兵駐水泉營中路叅將統援兵駐
蕎麥川暗門東路叅將統援兵駐廣武站太原叅將統援
兵駐馬蘭口神機司把總統標兵駐舊廣武白草溝北樓
叅將統援兵暫駐長柴嶺遊擊統游兵暫駐八角堡王
家屏三邊修守記陽方口西迄小紅溝寨八里又西築八
利境之尖山梁寨十里旣成而公視東隅不稱復增築馮
家梁寨二十里屬之王野梁以綰寧雁之界面陽方左右
顧兩臂若畫一矣甃三城陽方神池利民增築土堡一八
角

寧化守禦所寧化所城方二里餘高三仞厚二仞門樓三

洪武二年築 隋立汾源宮建城周六里四十一步明洪

武二年因舊址東畔倚山坡改建周二里一百九十六步

高三丈一尺池深一丈五尺西南北三門萬歷三十四年

寧武道郭光燾磚東西關城二座 宋太平興國五年置

寧化軍寧化縣隸焉 淳熙九年金置寧化州 明初置

寧化所隸山西都司嘉靖十九年都御史陳講請改隸寧

武從之 宋志寧化軍四砦 西陽 腦子 細腰 窟

谷 明寧化四堡 石壩 榆會 川湖 大峪屯 寧

化十四寨 馬頭山 吳家溝 小橫溝 牛心 三岔

定河 葱園 楊房 子房 石佛 細窯 灰窯

石家 賀家屯 明寧化守禦千戶所在靜樂縣北八十

里置正副千戶百戶旗軍三千三百四十八名 明洪武

二年都指揮常守道駐兵寧化所五年延安侯唐勝宗增築寧化城率千戶唐成勦四大王部 嘉靖十五年俺答繇崖頭入至寧化三馬營

寧文堡西一里寧武城處東偏西山下臨識者慮其難守明正德十年兵備副使張鳳狃議城寧文堡於西山共相犄角 又耕曰寧文城而寧武可守與江左戍石頭意同

樓煩鎮寧化所嶺北有東路南路嶺南有河川天城川西川南川細磨川嶺南北外又有西路北路而樓煩鎮爲河川村首乃嶺南第一村也漢立雁門郡樓煩縣元魏建樓煩宮隋唐立樓煩郡唐置樓煩監 遼耕陽武砦及寧化火山北地知并州韓琦鑿塹立石界之

堡口寧武堡口險隘非尋常堡寨比

大河堡在東二里

石湖嶺

石湖水口在東二十里

翁萬達疏曰自石湖嶺

起西至野猪溝止爲垣七里塹十之一增添敵臺二十八
舖屋八十四又自野猪溝起東至石湖嶺止爲垣六里有
奇增添敵臺九十二舖屋二百七十六水口三暗門二自
石湖嶺起東至鵬窩梁小西溝止爲垣六里有奇增添敵
臺八十六舖屋二百五十八品窖七萬六千二百二十四
暗門二水口十一水洞三

石湖嶺堡

野猪嶺堡在縣境

王野梁石湖嶺東明嘉靖二十年八月吉囊繇朔州入至王

野梁副總兵丁璋游擊周宇戰沒遂深入太原嘉靖十

一年都御史陳達請城雁門諸隘起王野梁歷白草溝水

峪口至平刑關爲石垣高濶以一丈爲式

五花營東一百二十里

火燒溝東南十五里

金家觜東南八十里

靳家窰東南四十里

夾柳樹堡東南六十里

詳寧縣

小蓮花堡東南七十里

詳寧縣

盤道梁堡東南八十里

詳寧縣

朔寧堡東南二十里

燕兒水堡東南四十里

西溝口堡

東南四十五里

鵬窩梁堡東南六十五里

三馬營堡

西六十里

大水口堡北三十五里

石槽堡

麻峪堡

三岔堡

西嶺堡

馬圈灣堡

黃土坡堡

金家堡

張家堡 梅家堡 楊家堡 東莊 馬營村堡 頭

馬營堡 分水嶺寨 八答窰寨 石嘴頭寨 白馬崖

寨 紅村寨 汾河溝寨 謝家溝寨 白臺寺寨 反

口深烟寨 壩上寨 石莊寨

偏關縣

偏關縣長城東接平魯丫角山起西接河曲縣河口鋪止

明老營堡制五眼井墩北直赤山東接朔州衛丫角山墩長

城復折而西爲山西老營堡界首繇東北至右衛兔毛河

西墩止胥有長塹又西有關繇關北出有長城塹東起赤

山西止廟記山廟記山北乃哈屯不喇也又西爲青草卯

墩長城復迤北又西爲將臺堂門耳房胥具南直官河源

又西爲破魯關又西爲垣內平安口墩又西爲阻虎墩南